

INUIT ATAQATIGIIT

Inatsisartuni



24. februar 2017

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

- 1. Isumaginninnikkut suliaasat eqqortumik naammassineqartalissappata nuna tamakkerlugu atorfiit qassit suullu amigaatappat?**
- 2. Isumaginninnikkut sulisut naleqquttumik amerlassuseqalernerat qanoq aningaasatigut naleqassava?**
- 3. Kommunit isumaginninnikkut suliaasaannut Naalakkersuisut qanoq ikiuussinnaappat?**
- 4. Sulisussat naammangippata avataaniit tikisitsisoqartalissava?**
- 5. Isorliunerusuni isumaginninnermi sulinissaq qanoq kajungernartunngortinniarneqassava?**

(Inatsisartuni ilaasortaq Kelly Berthelsen, Inuit Ataqatigiit)

Tunggavilersuut:

Isumaginninnermi Nakkutilliisoqarfiup misissuisarneratigut paasineqartarpoq isumaginninnikkut sullissineq pingaartumik isorliunerusuni inatsisitigut sulisoqarnikkullu piunasaqaatinik naammassinniffiuneq ajortoq. Aamma isumaginninnermi siunnersortit suliaasat amerlanerpaaffilerniarneqarput.

Nakkutilliisoqarfiup paasisai - tassa sullissinerup inorsarneranik - qanoq iliorfiginiarneqassappat? Kommunit suliaminnik naammassinnissinnaanginnerarlugit isornartorsiortuaannarneqassappat uffa immaqa ilinniarsimasut nunatsinni naammattut pigineqalersimanngitsut? Illuatungaani isumaginninnermi ilinniarsimasut naammattut pigineqarsimappata qanoq ilillugit isumaginnittoqarfinni sulileqqinnissaannut kajumissaassavavut sulisooreersullu allani sulilinnginnissaat qanoq qularnaassavarput?

Inatsisit pissusiviusunut naleqqussarneqassappata qanoq iliortoqassava? Uuttuutit suut atorneqarnissaat ilisimaneqarpa? Inuttut pisinnaatitaaffiit meeqqallu pisinnaatitaaffii unioqqutinngikkaluarlugit piunasaqaatit pissusiviusunut naleqqussarneqarsinnaappat?

Ullut qulit suliffiusut qaangiutsinnagit akineqarnissara kissaatigaara.